



Club da Skiunzs Zuoz

Protocol da la radunanza generela dals 1 december 2022

20h, Sur En Zuoz

Preschaints: 31 commembers e la suprastanza cun 6 persunas. In tuot 37 persunas.

S-chüsos: 13 commembers s'haun s-chüsos.

- Tractandas:**
1. Bivgnaint
 2. Protocol da la radunanza generela dals 26.11.21 (vair pagina d'internet CdS Zuoz)
 3. Rapports: President
Schef cuorsas e materiel
Schef giuvenils
 4. Müdamaints
 5. Quint annuel 2021/2022
 6. Rapport dals revisuors e dis-charg a la suprastanza
 7. Tschernas
 8. Onorificaziuns
 9. Program annuel 2021/2022
 10. Varia

1. Bivgnaint

Il president Thomas Pinchera salüda a 31 commembras e commembers. A sun entredas diversas s-chüsas chi nu vegnan però elettas. Displaschaivelmaing es eir quist an da piglier cumgio dad ün commember, nempe da Hanni Picco. Nus fainsa ün minut da silenzi.

La bannida es gnida tramissa a temp ütil cullas tractandas. A nu do ünguotta dad agiundscher.

Scu scrutinadur vegnan proponieus Gian-Paul Derungs e Reto Grundbacher. Els vegnan elets ed acceptos sainza cuntravuschs da la radunanza.

2. Protocol da la radunanza generela dals 26 november 2021

Il protocol da la radunanza generela dals 26 november 2021 as ho pudieu leger sùlla pagina d'internet dal CdS Zuoz e vain approvo unanimamaing da la radunanza. Il president ingrazcha a l'actuara Corinna Badilatti Steger per la cumpiliaziun.

3. Rapports

Rapport anuel 2021/2022 dal president Thomas Pinchera:

Thomas Pinchera prelegia sieu rapport:

Stimedas commembras

Stimos commembers

Eau guard inavous sün mia prüma «dretta» stagiun d'inviern scu president dal Club da Skiunzs Zuoz. Que vuol dir üna stagiun cun pochhas restricziuns da la vart da Corona.

Eau vögl cumazer mieu sguard inavous cun ün evenimaint fich allegraivel, nempe la surdeda da las giaccas da l'JO da skis alpin. In connex cun ün pitschen aperitif insembel culs sponsurs vainsa inauguro las giaccas il di da l'avertüra dals runels da skis a Zuoz.

Ils 22 schner ho gieu lö la 9evla ediziun da La Diagonela cun partenza a Puntraschigna e böt illa vschinauncha da Zuoz. Grazcha als divers Voluntaris dal Club da Skiunzs d'eira quist evenimaint ün grand success.

Ils 29 schner 2022 vainsa darcho üna vouta organiso il di da veterans, inua cha vainsa pudieu bivgnanter diversas skiunzas e skiunzs sur 50. Tres las restricziuns actuelas a regard Corona esa be sto pussibel da fer ün aperitif sün la terrazza dal Restorant Pizzet e na scu üsito ün bel gianter aint il stüvin. Ma causa la bell'ora e las temperaturas fich agreablas haun ils preschaints gieu tuot flot e giodieu la cumpagnia fich divertaivla.

L'«Engadin Ski Cup» ho gieu lö ils 5 e 6 favrer 2022 sün la pista naira da Pizzet. Cun ca. 350 iffaunts sur quists duos dis vainsa procuro ün bel schmerdsch eir pels runels e restaurants sün las pistas da Zuoz. Quist evenimaint es gnieu organiso da nus e da las scoulas da cuorsa Speciale e Giorgio Rocca. Quels chi cugnuoschan quists duos Clubs da Skiunzs saun cha l'organisaziun insembel cun els nun es adüna dal tuot simpla.

Il di da famiglias vess gieu lö ils 19 favrer 2022 insembel cul Zuoz Rocks. Displaschaivelmaing vainsa gieu fich pochhas annunchsas da genituors. Quellas duos persunas chi haun fat part haun pero pudieu giodair la plain'attenziun da la suprastanza.

Zieva duos ans posa ho ils 13 marz 2022 darcho gieu lö il Marathon Engiadinais. Scu üsito ho il Club da Skiunzs pissero pel bainster dals curriduors ed aspettatuors il areel dal böt. Eir per quels curriduors chi haun durmieu illa FLAB vainsa cuschino tschaina e fat üna bella culazchun aunz la cuorsa. Our da motivs da restricziuns da Corona vainsa displaschaivelmaing stuvieu rennuzcher sün üna musica illa sela da festa. Cun que es eir il richev dal Marathon 2022 considerabel pü bas scu oters ans. Adonta cha Fredy Sigg nun es pü part da la suprastanza, pudainsa pero listess fer quint cun el scu capo cuschinunz ed organisatur principel da las restoraziuns sün tuot la piazza dal böt. Grazcha fich Fredy per tieu grandischma lavur!

Ün'eivna zieva il Marathon vainsa pudieu trer tres las maestraunzas dal Club. In venderdi saira cun üna cuorsa da passlung da not i'l Center Sur En ed il di zieva cun las cuorsas da skis sù Pizzet. Eir scha las relaziuns nu d'eiran propcha simplas ho listess minchün do il meglder pussibel. Per me es que adüna

darcho bel da vzair scu cha grand e pitschen cumbattan per buns resultats. La fin da quists duos dis da cuorsa haun fat la tschaina e las rangaziuns da tuot las cuorsas e cumbinaziuns. Grazcha a nos divers sponsuors ed üna buna faculted vainsa gieu la pussibilted d'organiser üna tombola grandiusa, uschè cha minch'iffaunt ho banduno il Restorant Allegra cun ün bel surrier.

Il 15 avrigl 2022 ho finelmaing darcho gieu lö la Gita Risotto. Üna gruppa ho fat üna bella gita sül Piz Arpiglia ed inavaunt sül Piz Utèr. La naiv propcha marscha ans ho fat ün strich tres il quint ed uschè nun ho que do üna bella "skiada", dimperse üna bella "stumplada" fin tar l'Alp Arpiglia, inua cha vainsa inscuntro la seguonda gruppa chi'd es gnida sü direct sün Alp. Ün stupend risotto ho pero darcho purto inavous la buna glüna a quels chi haun visito ils duos pizs. Grazcha fich als cuschinunzs dal risotto suot la bachetta da Lala e Nöldi!

Tres la situaziun da naiv pü tost s-charsa vainsa gieu da dir giò l'ün u l'oter evenimaint scu p. ex. gitas da cler glüna u la cuorsa dal Késch. Per l'excursiun da famiglias a Tovo/ Clostra vaiva que bainschi naiv avuonda, ma l'ora da plövgia ans ho sfurzeda da dir giò eir quist evenimaint.

Zieva avair fat üna stagiun cumpletta ans vainsa nus da la suprastanza chattos insembel per recapituler ed analiser la stagiun passeda. Suot la bachetta da Thomas Fent vainsa pruvo da svilupper novas spüertas e möds da communicaziun. Ils resultat da quist di da clausura as vulainsa spiegher il tractandum dal program annuel.

Que chi'm ho darcho fat fich grand plaschair la stagiun passeda es l'JO da skis e passlung. Ils ca. 45 iffaunts haun fat part a divers trenamaints e dafatta a cuorsas da skis da not. E sch'eu guard inavaunt sülla stagiun 22/23, schi poss eau constater cha que vo inavaunt uschè.

Per glivrer vulesse eau ingrazcher cordielmaing a tuot ils voluntaris da La Diagonela e dal Marathon Engiadinais per lur grand engaschamaint.

Eau ingrazch eir als mneders da l'JO passlung e skis alpin per lur temp ch'els mettan a dispusiziun pels giuvenils.

E natürelmaing ingrazch eau eir a mieus collegs da suprastanza per lur grand ingaschamaint per noss club.

Cun que giavüsche eau a tuots ün bun invier cun bgeras bellas uras illa naiv.

Grazcha fich per l'attenziun.

Rapport schef cuorsas e materiel 2021/2022 Gian Malär:

Cuorsas

Sguard inavaunt sülla stagiun 2022/23:

Gian Malär sperescha scha pudainsa fer ün u l'oter evenimaint. Planisedas sun duos cuorsas dal Engadin Ski Cup ils 5 e 6 favrer 2023 e las cuorsas da nos Club ils 18 e 19 marz 2023.

Materiel:

Gian managia, cha in generel saja il materiel in ün bun stedi e possa gnir druvo eir quista stagiun sainza problems.

Rapport dal schef giuvenils 2021/2022 Flurin Derungs:

Flurin Derungs prelegia sieu rapport per l'ultima vouta:

Scu üsito vainsa cumanzo eir quist an il trenamaint da sted zieva las vacanzas da sted. Nus vains pudieu piglier incunter 45 annunzchas. Culs 7 da la scoulina gninsa sün ün totel da 52 iffauts.

Da quels 52 haun fat 22 iffauts tuottas duos disciplinas, 16 be alpin, 7 be passlung e 7 haun pigio part a l'JO scoulina.

Il trenamaint da sted ho mno Julia Malär. l' ultim trenamaint vainsa fat üna pitschna occurrenza, causa Covid aunch'üna vouta sainza aspettatuors.

JO passlung

Per l'ultima vouta vainsa pudieu ingascher ad Andri Marugg scu mneder principel pel passlung. Già al cumanzamaint da l'inviern ans ho Andri infurmo, cha que saregia zieva 5 ans sia ultima stagiun scu mneder. Ün mneder chi resta sgür a tuots in bun'algordanza, saja que cun sieus sagls spectaculers sur mincha schanza pussibla ed impussibla, sias gitas tres la naiv lamma, sia humor, sia möd motivand ed ün pô cun üna testa düra. Ma tuot que adüna cun bger plaschair ed ingaschamaint. Andri ho gieu sustegn eir quist'an impustüt da Tamara Haregger.

Els haun cumanzo lur trenamaint sülla naiv als 2 december, il focus scu eir già ils ultims ans es il plaschair vi dal muvimaint ed amegldrer la tecnica. Il "highlight" es sto in schner culla Diagonela. Cun que cha'l böt es immez Zuoz, vainsa pudieu motiver a 10 iffauts da's participar a La Cuorta. Tuots 10 sun rivos zieva 11km stracs ma cuntaints aint il böt. In schner essans eir stos per la prüma vouta culs skis da passlung sül runel da Survih. Per tuots ün grand plaschai!

La finischiun da l'JO passlung es steda la cuorsa dal club, chi ho gieu lö in venderdi saira.

JO alpin

Il trenamaint alpin ho cumanzo eir quist an sü Marguns. Grazcha a numerus sponsurs vainsa pudieu inaugurer las novas giaccas al prüm trenamaint a Zuoz.

Eir quist an vainsa pudieu giodair las sandas culs magisters da skis, cun trenamaints varios aint illa naiv lamma e sün pista. Cun iffauts pü ambiziunos essans ieus duos voutas a la cuorsa da not a Puntraschigna. Allegraivelmaing as haun participos a quellas cuorsas ca.20 iffauts. Eir quist an vainsa pudieu passer üna stagiun sainza grands accidaints.

La finischiun da l'JO alpin es steda la cuorsa dal club.

Ingrazcher vulessi in quist'occasiun a Gudi ed a sia squedra da magistras e magisters da skis, chi sun tar minch'ora tiers cun bger plaschair ed ingaschamaint.

JO scoulina

Noss pü pitschens commembers dal club, que sun ils grands da la scoulina, els d'eiran adüna in marculdi zievamezdi sün pista. Julia Malär es steda per la prüma vouta la mnedra da quista gruppa. Ils zievamezdis da skis cumainzan tar els in schner e vaun alura fin in marz tar la cuorsa da club. Tar quist evenimaint da finischiun sun eir ils pü pitschens da la partida. Que fo impreschiun cun che tempo cha'ls pü pitschens passan tres las portas da la stipa pista dal Pizzet.

Grazcha fich Julia per tieu temp ed igaschamaint pels pü pitschens.

Eau vuless aunch'ingrazcher a tuot quels e quellas chi haun sustgnieu il Club.

4. Müdamaints

Karin Casty quinta:

Düraunt l'an da gestiun ho que do ils seguaints müdamaints:

Nouvas entregias da commembers dal club sun 10 persunas e 17 persunas haun abanduno il club.

Il club as cumpuona actualmaing our da:

48 commembers JO

175 commembers passivs

49 commembers activs

26 commembers libers e d'onur

Total sun que 298 commembers.

5. Quint annuel 2021/2022

La chaschiera Karin Casty preschainta cuort il rendaquint finel e'l bilauntsch.

(Vair rendaquint e bilauntsch detaglio separo)

Stimo president, stimeda suprastanza e stimos commembers dal club da skiunzs da Zuoz.

Gugent as vögl eau preschanter il rendaquint ed il bilauntsch da l'an 2021/2022.

Zieva duos ans cun ün rendaquint negativ suni cuntainta da preschanter per l'an 2021/2022 ün rendaquint positiv. Nus serrains giò il rendaquint annuel cun ün guadagn da 70'327 francs e 85 raps.

Il rendaquint annuel positiv as cumpuona our da seguaints motifs:

Rimbuorsamaint da 20'000 francs dal chapitel da basa da la societad Restorant Pizzet Zuoz chid es liquidada cun que a nolla.

Impü ho il Club da Skiunzs Zuoz survgnieu 25'000 francs cun que cha ils maratons engiadiais 2020 e 2021 our dal motiv covid nun haun pudieu gnir realisos. Quist import vain dal Swiss Ski Pool.

Dal 2022 finalmaing vains organiso darcho la festa dal böt dal maraton quel ans ho purto ün guadagn da circa 20'000 francs.

Scu ultim import important ans es resto 18'000 francs our da las entredgias da sponsoring per las giaccas alpinas. Quist import pero vain druvo per pustaziuns posteriusas per il rendaquint 2022/2023

Nossa facultad as demuossa in ün fich bun stedi. La gestiun per ils prossems ans es cun que sgüreda, e nus pudains fer quint cun ulteriuras entredgias dal maraton engiadinai.

La facultad dal club per la fin da gün 2022 importa 104'229 francs e 31 raps.

Per ulteriuras dumandas u infurmaziuns stun eau gugent a disposiziun.

Il rendaint vain accepto unanimamaing sainza cuntervuschs.

6. Rapport dals revisuors

Il revisuors propouonan a la radunanza da der dis-charg a la suprastanza.

Il rapport vain accepto e la radunanza do dis-charg a la suprastanza.

Nos president Thomas Pinchera ingrazcha als revisuors Niculin Arquint e Ramun Ratti per lur lavur.

7. Tschernas

Displaschaivelmaing ans banduna Thomas Fent zieva 14 ans illa suprastanza.

Per la successiun vainsa chatto ad Andrina Brunner. Tuots sun perinclets cha pigliainsa ad Andrina in suprastanza. Andrina vain tschernida unanimamaing.

8. Onorificaziuns

Quist an nu do que üngünas onorificaziuns.

9. Program annuel 2021/2022

Thomas Pinchera muossa il program annuel (voir homepage), chi'd es dvanto ün pô pü stret. Aint il program annuel sun aint ils puncts fix. Nus vainsa ün program vario i'l ram scu eir ils ultims rams. Nouv as po s'annunzcher directamaing sur la homepage e per las gruppas da whatsapp chi spordschan diversas activiteds.

10. Varia

Thomas Pinchera ingrazcha a Thomas Fent per la granda lavur prasteda aint il club e pel sport in Engiadina d'uraunt ils ultims 14 ans e surdo ün pitschen regal. La part voluntari pel ESM tegna Thomas pero eir in avegnir. Thomas es commember d'onur.

Thomas Fent tegna eir auncha ün pled e s'ingrazcha per tuot.

Üngün'oter nun ho oters puncts.

La radunanza vain serreda a las 20.47h.

In buna fé

L'actuara